

**"Bigo ang Rehimeng  
Duterte na agawin  
ang ating lupang  
ninuno. Hindi NCIP,  
IPMR o anumang  
ahensya ng gubyrno  
ang nagbigay sa atin  
ng karapatan sa lupa,  
kundi ang ating  
kapasyahan na ilaban  
at bungkalin ito  
kasama ang Partido  
Komunista ng  
Pilipinas at NPA."**



## *Isang Kwento ng Tagumpay*

Sa isang komunidad ng mga Ayta sa Zambales Mountain Range, maririnig ang masisiglang padyak ng mga paa kasabay ng matinis na mga boses. Nagtatawanan sila. Nagbubunyi sa saliw ng tugtog ng kutibong,

Mula sa malayo ay matatanaw ang malawak na kabundukang may tanim na palay, kamote, mais, gabi at marami pang gulay na makakain. Sinong mag-aakala na ang lugar na ito ay muling magkukulay luntian sa mga pananim na tumutugon sa pangangailangan ng komunidad?

Tatlong taon ang nakararaan, dineklara itong pampublikong pag-aari ng rehimeng Duterte sa pamamagitan ng programang National Greening Program (NGP). Ginawa itong plantasyon ng Mangium, Eucalyptus, Paper Tree at iba pang kahoy na pang-eksport. Pati sementeryo ay tinamanan.

Noong una, naengganyo sila na magtrabaho sa NGP. Hindi naman daw kasi kukunin sa kanila ang lupa. May pasweldong P250 kada araw at pwede pang mag-adbans ng bigas, kape, asukal at tabako. Kalaunan, napagtanto nila na wala na silang oras para asikasuhin ang sariling uma. Unti-unting naubos ang pananim nilang makakain. Natapos ang trabaho sa NGP na may utang pa sila kay Kapitan, ang lider ng P. O. na nagpapasweldo sa kanila. Napag-alaman nila na P300 talaga ang sahod. May patong pa sa presyo ng pang-kunsumo na kanilang inutang. Pero ang pinakamasakilap ay nawalan sila ng lupang mapagtamnan.

May isang nangahas nagputol ng kahoy para muling mag-uma. Nabidyo siya ng drone at kinasuhan ng DENR. May isang nagsunog ng kaingin malapit sa plantasyon. Kinasuhan siya ng arson. Kalaunan, kasama ang 3rd Mechanized Infantry Battalion at mga pulis, inanunsyo ng DENR ang pagpapalayas sa masang Ayta.

Gamit ang mapanlokong proyektong NGP, pinalalayas at sinasampahan ng kasong kriminal ng rehimeng Duterte ang mga magsasakang pumupusisyon at nagbubungkal sa lupa. Ang NGP ay isa lamang sa mga instrumento ng reaksyunaryong gubyrerno bilang paghahanda sa mas malaki, mapangamkam at mapangwasak na proyekto gaya ng pagtatayo ng dam.

Hanggang nang muling makabalik ang NPA.

Mayaman ang rebolusyunaryong kasaysayan ng tribu. Dumanas man ng militarisasyon at matagal nabalikan, hindi sila nagmaliw sa pagmamahal, pagkalinga at pagtaguyod sa kanilang Hukbo. Kaagad na naglunsad ng panlipunang pagsisiyasat at pagsusuri sa uri ang mga kasama. Binuong muli ang Sangay ng Partido sa lokalidad, itinayong muli ang Milisyang Bayan, ang Pamansang Katipunan ng mga Magbubukid (PKM) at ang Rebolusyonaryong Organisasyon ng Ayta (ROA). Naglunsad ng pagpuna at pagpuna sa sarili sa pagitan ng Partido, Hukbo at masa. Binalik aralan ang nakaraan nilang mga tagumpay sa pagtatanggol sa lupang ninuno, gayun din ng iba pang tribung Ayta. Sa gabay ng PKP at tulong ng NPA pinagplanuhan nila kung paano babawiin ang lupang kinamkam ng DENR.

At inlunsad nila ang aktwal na pagkilos. Binunot ang mga mohon. Pinutol ang mga patanim ng DENR na hindi kapaki-pakinabang at inilipat sa sariling uma yaong mapakikinaabangan. Nagbahagian ng mga binhi at nagbayanihan para mapabilis ang trabaho.

"Kung ikukulong ninyo ang sinuman sa amin, ikulong niyo na kaming lahat, " sabi ni Lakay Silong sa DENR at militar ng bawalan silang muli.

"Bahala kayo kung gusto ninyong kumitid ang lupang tinatapakan ninyo," pabulong na sabi naman ni Tasya, kasapi ng MAKIBAKA sa baryo.

Makalipas ang ilang buwan, nabalitaan nila na inambus ng yunit ng NPA sa Palauig, Zambales ang SAF na kasa-kasama ng DENR sa pagbabawal sa mga magsasaka na maghanapuhay sa bundok. Hindi na muling umakyat ang DENR sa kanilang lugar.

Humahalimuyak ang kabundukan sa amoy ng nahihinog na palay. Salimbayan ang kalampagan ng sirang yero at pilantik ng mga buho na bumubugaw sa mga ibon. May nagbabayo, may nagtatahip, may nagsasaing na ng inaning palay.

Pumailanlang ang nagsasagutang *daruro* ng matatanda sa tribu na nagsusuma sa dahilan ng kanilang masayang pagtitipon.

**"Hindi ito pag-aari ng gubyrernong panginoong maylupa at mga negosyante. Ito ay teritoryong Ayta. Hindi ito plantasyon ng mga kahoy na pang-eksport. Ito ay pamayanan na nagtatanim para may makain. Hindi mga mohon o titulo ng CADC ang sumusukat dito, kundi ang ating pawis at dugong iniaalay para pagyamanin ito. Hindi tayo umaasa sa ililimos ng reaksyunaryong pulitika, kundi rebolusyunaryong katapangan at makauring kamulatan para ipagtanggol ito."**



Tangan ang mga aral sa nakaraan, nakahanda ang tribu na salagin ang anumang pamamaraan ng estado para agawin ang kanilang lupa. Ngayon pa kayang mas mahigpit ang kanilang pagkakaisa sa iba pang pamayanang Ayta at mga magsasakang katulad nila ay inaapi at pinagsasamantalahan! Ang pagtatanggol sa lupang ninuno ay hindi na lamang para sa lahi kundi laban para sa demokratikong interes ng uring magsasaka at iba pang uring api. Ito ang kanilang ambag sa pagpapabagsak sa estadong panginoong maylupa-burgesya kumprador na kontrolado ng imperyalistang kapangyarihan.

Hindi pa tapos ang laban. Ikinararantal nila ang pagpapasampa sa kanilang mga anak sa NPA para tuwirang mag-ambag sa pagpapalakas sa armadong pakikibaka. Ito ang kwento ng tagumpay ng tribu Pag-asa.

## ***Gerilyang Produksyon***

### **Tugon ng masa sa**

#### **pagbabawal ng DENR na magtanim sa kabundukan**

**H**indi pangkaraniwan ang umagang iyon. Tambak ang sako-sakong luya sa plaza. Marami ang nakakalat na may mga dahon pa. Ang iba ay inuupuan at sinasandalan ng mga militar na halatang puyat at pagod. Sa kanilang putikang uniporme, nakabulsa ang mga pira-pirasong kamote, ube at saging.

"Pasensyahan na lang kung kanino man ang panananim na ito. Sinabi na sa inyo noon pa man na bawal magkaingin sa bundok. Pag naaktuhan namin kayo, siguradong kulong kayo." Nakaparmaywang pa ang kinatawan ng DENR na nagbabanta sa mga mag-uuma.

Paano kung ganon mabubuhay ang sisenta porsyento ng populasyong magsasaka na walang pagmamay-aring lupa?

Walang matamnan sa kapatagan at laylayan dahil pawang pagmamay-ari na ng mga pribadong kumpanya at mga panginoong maylupa. Wala ring industriya ang bansa na makapagbibigay ng permanenteng trabaho sa milyun-milyong masang anakpawis. Kung ang batas ng reaksiyunaryong guberno ng Pilipinas ang masusunod, mamamatay sa gutom ang pamilyang magsasaka sa malawak na kanayunan

Lalo na ngayong may pandemyang COVID-19, ang pagkaing nagmumula sa kalikasan at resulta ng paglilinang sa lupa ang paniyak na pagkain at kabuhayan ng masa.

Sa kaloob-looban ng makapal na gubat sa Zambales Mountain Range, nakilala ng Bagong Hukbong Bayan si Pinggoy. Tinatiyaga ng kanyang pamilya ang mahigít anim na oras na paglalakad para bagtasin ang matarik na kabundukan.



Sa dasdas na natatakpan ng matataas at matatalim na talahib, madawag na sukal, at napapalibutan ng malalaki at mayayabong na puno - nakakubli roon ang malalawak na uma. Nakatanim ang luya, gabi, ube, kamote, saging, mais at iba pang gulay.

Mahigit 20 pamilya sila na nanggaling sa magkakaibang baryo. Marami sa kanila ay nawalan ng lupang matataman dahil sinaklaw ng reforestation ng DENR. Ang iba naman ay nawalan ng uma dahil sinaklaw ng ginagawang kalsada. Ang iba pa ay sinaklaw ng eko-turismo. Meron pang pinalayas ng kumpanya ng minahan na nagmamay-ari daw sa lupang kanilang tinitirhan at binubungkal. Iba't iba man ang kadahilanan, pinagtagpo sila ng kahirapan at kapasahang lunasan ang kagutuman.

Gerilyang produksyon ang sagot ng masa sa pagbabawal sa kanila na magtanim sa bundok. Pati pag-aani at pagbababa sa baryo ng kanilang produkto ay mainat at sekreto rin nilang ginagawa.

Si Pinggoy ay ilan lang sa milyun-milyong kabataang magsasaka na nagtatrabaho sa uma at bukid simula ng natutunan niyang gumamit ng itak. Bahagi ng kanilang gerilyang produksyon ang pagyayantok, paghahanting, pangangalap ng orkids at iba pang makakalap na kabuhayan sa kabundukan.

Sa ilalim ng bandila ng Pambansang Katipunan ng Magbubukid sa Pilipinas (PKM), ang rebolusyonaryong organisasyon ng masang magsasaka, nabigkis ang mga gerilyang magsasaka sa pagtataguyod at pagtatanggol sa pambansa demokratikong karapatan ng uring magsasaka. Nagbuo sila ng mga kongkretong patakaran kung paano pangangalagaan ang kagubatan habang isinusulong nila ang tuloy-tuloy na pagpapaulad sa produksyon.



- Tinukoy ang mga estratehikong pinagmumulan ng tubig sa gubat at nagkaisang pangalagaan ito.
- Mas matrabaho, pero tatyagain nilang putulin ang mga sanga ng punong kahoy na kakayanin sa halip na ibuwal lahat.
- Ang mga lumang uma ay tataman ng mga punong kahoy na narmumunga para sa pangmatagalan na pakinabang at bilang pamalit sa mga punong binuwal..
- Higit na paramihin ang pananim para sa pangkain kaysa pananim na pambenta gaya ng luya na bulnerable sa komersyanteng pagsasamantala at mabilis makasaid sa sustansya ng lupa.
- Magtanim ng palay sa paraang magkakatabi, magkakarugtong na uma at nagtutulungan.




**Pinupuri ng BHB-Kanluran Gitnang Luzon ang gerilyang produksyon ng magsasaka bilang anyo ng kanilang tuwirang paggigiit sa karapatan sa lupa. Gayunman, kailangang isanib ang ganitong pang-ekonomyang aktibidad sa pulitikal na pakikibaka sa anyo ng pagbubuo ng malawak na nagkakaisang prenteng anti-pyudal.**

**Kailangang ilantad at puspusang labanan ang mga kontra-magsasakang proyekto ng estado gaya ng National Greening Program, mapangwasak na pagmimina ng mga dambuhalang korporasyon, malakihang pagtotoroso, eko-turismo, pagtatayo ng mga dambuhalang dam at iba pang mapangamkam ng lupa na mga proyekto.**

Kailangang ituro! ang talim ng pakikibaka sa naghaharing pangkat ng rehimen ng Duterte na sagad sa buto ang kalupitan at kasakiman, at pagpapakatuta sa imperialistang kapangyarihan. Higit sa lahat, malutas lamang ang problema sa lupa ng magsasaka sa pamamagitan ng pagsusulong ng demokratikong rebolusyong bayan para maisakatuparan ang tunay na reporma sa lupa.

Ang BHB ay hindi lamang hukbong panlaban, pampulitika at pangkultura. Ito rin ay hukbong pamproduksyon. Nakasanib sa masa, pinaunlad ang produksyon habang naglulunsad ng pakikidigmang gerilya. Nagbubungkal, naglilinan ng lupa, nagtatanim, saanman posible at pinapahintulot ng sitwasyong militar. Tumutuwang sa gawaing produksyon ng masa at pagtatanggol sa lupa para sa matagalang pagpupunyagi sa kabuhayan at paninirahan.


"Kailangan talagang magrebolusyon para magka-lupa at makapag-produksyon ang magsasaka," sambit ni Pinggoy kaugnay sa pangungulimbat ng DENR at militar sa kanilang mga pananim.

Produksyon at rebolusyon. Gaya ng pagsasanib ng Partido Komunista ng Pilipinas, Bagong Hukbong Bayan at masa ay hindi mapaghihiwalay. Rebolusyon para sa bago, masagana at makatao na sosyalistang lipunan. Produksyon para sa pagtatagumpay ng armadong rebolusyon. 





# PALAISIPAN



Baha na naman. May gumuhong lupa. May natibag na bundok. Maraming bahay ang nalubog sa putik at tubig baha. May mga namatay dulot ng kalamidad. Pagkatapos ng Bagyong Rolly at Ulysses nitong Nobyembre, kanya-kanyang hugas ng kanilang putikang kamay ang mga negosyanteng pulitiko sa burukrasya ng rehimeng Duterte.

Mga **ka-Bigwas**, bakit nga kaya palala ng palala ang mga pagbaha sa bansa? Alin kaya sa mga sumusunod ang dahilan?

- (a.) Pagkawasak ng kabundukan dulot ng malaking pagmimina at pagku-kwari;
- (b.) Operasyon ng mga dambuhalang dam na laging ipinapatiuna ang tubo mula sa malilikhang kuryente kaya isinasagad ang pag-iimbak ng buito ng tubig sa panahon ng bagyo sa halip na maagap na magpakawala ng tubig para hindi makapaminsala sa mabababang lugar.
- (k.) Palpak na reforestation ng DENR. Sa halip na magtanim sa kabundukan ng mga puno na nakakapagpatibay sa kapit ng lupa, mga pang-eksport na puno ang itinatanim na magkakalbo rin sa kabundukan pagkalipas ng ilang taon. Masahol pa, sa mga uma/gasak na may mga pananim na ng masa ang tinataman.
- (d.) Taunang pagsusunog sa kabundukan ng mga panginoong maylupang rantsero;
- (e.) Mga lason at basura ng malalaking pabrika na bumabara sa daluyan ng tubig.
- (g.) Kapabayaanan at talamak na korapsyon sa National Irrigation Authority (NIA), Department of Public Works and Highways (DPWH), at iba pang ahensya ng reaksyunaryong guberno na responsable sa pag-aayos ng mga kanal at daluyan ng tubig.
- (h.) Pagtatayo ng mga subdibisyon, mga gusali at imprastruktura ng mga kumpanya sa Real Estate at Konstruksyon na walang pagsasaalang-alang sa daanan ng tubig.
- (i.) Mga magsasakang nagkakaingin sa bundok, mga nagkakarbon at nagtatablón.

Titik (i) ang sagot ng rehimeng Duterte. Hindi nakapagtataka na sa mga magsasakang naghahanapbuhay sa kabundukan ibubuntón ng naghaharing uri ang sisi. Kayo na ang maghugas ka-Bigwas. I-shout-out ninyo sa **Bigwas-KGL Facebook** ang inyong sagot at reaksiyon.